

南康縣志

卷九

藝文

南康縣志卷之九

藝文

藝文志昉於班固漢書紀書名卷帙及著作姓字而已
後世循其體例諸郡邑志列藝文於後此前三前諸撰述掌
故及文之有關於政治民事風土山川者咸錄焉世積
而事繁事積而文繁於是書數恒處十之三蓋紀言之
文與紀事之文並可相輔而行也康邑舊志人物列繫
一小傳而藝文士女仍附列傳本可毋庸贅錄第舊志
登之王志沿必有增無減未便遽刪姑仍附諸簡編云

宋

度宗御製字民銘

咸淳六年頒

治事必公。撫民必惠。邇者有訓。亦既切至。咨爾令長。守以勿墜。宣朕實意。斯爲愷悌。

頒發字民銘謝表

趙若深

伏以天語諄勤。實切子民之念。雲章炳煥。式增南國之榮。千載幸逢。一同胥慶。惶懼惶懼。頓首頓首。恭惟皇帝陛下。憂勤圖治。惻怛愛人。四方無虞。以寧式化厥訓。于室使爲之宰。不知其仁。肆發玉音。誕形奎畫。以致風行之令。旁周斗大之區。邇暫護於銅章。載祇承於綸命。刊之翠琬。永佩三十二字之銘。厚我蒼生。茂衍億萬斯年之厯。臣無任瞻天仰聖。激切屏營之至。謹奉表稱謝以

聞

字民銘石刻跋

臣洪惟我朝以仁立國藝祖皇帝撫養百姓之誓天地鬼神實式臨之列聖相承克至於今日休迺咸淳庚午皇帝踐祚之七年也字民有訓記之以銘必公必惠之言昭於星日百里生靈莫不懽呼鼓舞臣若渌叨護邑篆祇奉宸綸謹率僚屬百拜對揚休命臣竊念今於民最親者也一日必葺臣不敢以暫攝辭謹勒堅珉朝夕觀省庶無負君父愛民之實意

陽王巖像贊

蘇軾

道不二德不孤無人所有人所無世之所寶者五玉璫其二而昇其三是以月計之不足而歲計之有餘

代處守薦陽孝本狀

楊時

臣猥以菲才謬當郡寄竊惟事君之義莫尚以人而不祥之
實蔽賢爲大苟有所知臣敢不勉伏見郡有處士陽孝本學
富行純爲輿論信服曩遊京師一時忠義之士多從之學程
禍不完飯疏飲水而束脩之饋悉以市書捆載而歸自晦巖
穴不求仕進鄉閭故舊憐其貧協力周之非其義不受也此
雖古人操履無以過之當路柄臣亦嘗論薦然久未蒙旌擢
伏望聖慈不以臣言之輕特加收采錫之一命以稱朝廷尊
德勵善之實

南康縣官題名記

陳廷傑

郡縣之署壁皆有記而南康獨闕焉豈有疆理之大事務之
夥爲之長者倥偬引目不暇及耶抑亦嘗有之罹兵火之厄

而遂廢也。皇朝景祐初，陳公升之以進士中甲科，小試是邑。爲治有體，民至今稱之。幸有建學營廟，署位於梁，僅可稽其歲月。若夫前後相承，豈無善政訪諸故老，能道其時而忘其人，或得其人之姓而失其名，甚可惜也。予以庚午夏懷銅章來承凋敝之餘，雖悉心撫字，曾不見效，祇以自愧。今將及瓜而去矣，念欲補壁記之闕，求之故籍，則建炎以前淪於灰燼，無有存者。乃繼自紹興，改元趙公瑾以來，次第之庶幾後之君子有所攷焉。若邑得名與夫風俗之美、物產之宜，有圖經所載，茲不復序云。

南康縣新建縣治記

鄭霖

環百里以爲邑，邑有治所，以弼藩翰，班憲度，非美輪奐峻墀，序以務適，長民者之起居宴樂也。按西漢地理志，豫章郡十

八縣南。瑩居一焉。隋唐間。南瑩不復見。而南康名獨著。自皇
宋淳化元年。始置南安軍。而南康屬焉。封域所至。東南。贛。西。
南。大庾。西北。上猶。東北。萬安。踞嶺峙。其南界信豐。黃土嶺。盤
其北界龍泉。山谷峻深。溪洞綿亘。惟邑處四境之中。章水繚
繞。秀峰壁立。闕闐十百千戶。櫺比環向。大族巨室。頗有高其
門閭。垣墉池沼。園臺榭。無虛曠。故邑治規模。亦自昔壯觀。
戊子。洞寇舒謝倡亂。公私廬舍焚蕩幾盡。明年。寇再蹂踐。燬
燼無餘。令尹三山戴君先爲信豐尉。有能聲。來攝邑事。尋辟
爲真令。儒生有膽氣。民視爲趨向。連年寇賊。鴟張出沒。無常
令。視民瘡痍。肥梳剔抉。休養調護。晝夜不倦。終未能安集。又
明年冬。上特命京湖議軍三山陳公瑾。以大理丞持斧節制
二道。行營兵馬。不動聲色。誅三叛卒。一城安堵。綱常旣正。風

采大振而郡侯建安陳公梓又以德意撫摩帖強安頑民漸
復業令得奉宣條教號召離散是歲大稔而相度故趾中建
廳事翼以廊廡外爲樓爲門內爲室爲軒治獄有所寅賓有
所行文書有所司錢穀有所退政而休息有所一仍前規無
增損令不迫而人樂從政不擾而功克集旣落成合辭願借
留三年可想見人情所在矣嗚呼令何以得此於民邪庚寅
秋霖間津橫浦謁令於廳治堂下綿蕞數椽淒然如寄旣而
班荆對酌於蕭寺相與升虛望遠到眼無非瓦礫爲之咨嗟
太息以爲何時復見太平官府令曰是無難也吾先民所急
民亦急吾所先欲固民志吾居不可不就他日幸如所欲爲
願公識之霖曰諾吾識易耳君宜自力辛卯夏郡檄霖白事
憲臺見令畫於牆而鳩工取材焉僅營其一又三月自曹院

校士同再見向欲經營者俱遂矣瞻顧駭愕喟然歎曰信矣

其能也歟嘗從而思之昔者楚邱始遷衛人避狄息肩之時

也意者愛護基本宜有以安之可也定之方中作於楚宮民

不以爲勞以逸道使民散也蓋物睽而後有聚聚之者必建

城市營宮室以處之築室百堵如翬斯飛非小役也不能不

勞民而動眾也識者憂焉夫取民之材而不怨用民之力而

不困古無有也今也能使之不怨不困咸悅以趨豈有術以

驅之乎是不然民雖愚而其自謀也審矣鶚音曉曉旣毀我

室吾將綢繆牖戶而無風雨之患必有爲之保障則吾可聚

廬托處而無憂然則令者民之保障也歟依之者坻資之者

深歟是不容無言書之所以著其志凡坐此堂而布政者勿

忽焉

南康縣築城記

戴翼

紹定戊子，隣峒嘯兇，邑當寇衝。洊罹燔掠，重以鹽孽，南北交訐，民無定居。奔徙日困，令亟謀於眾，條便宜白諸司，果得請。卽肇役，金穀不敢干於朝，惟官民交致其力。城周八百二十有八丈，高八尺，內外翼以甃石，繞壕扈以柳棘。門四，弔橋浮橋二。壬辰三月十有九日，經始。次年亦以是月日底成，費約不下七萬緡。城南成，寇尙梗，屢闖我鄙，聞有備，不敢犯。邑人安枕無恐，始知保障之利。然城成矣，歲久或圯，修廢當及時。寇來無常，防患當有備。池濠有租，器械有庫，民丁有籍，弓弩有社，政爲此慮也。翼雖戍滿當去，寸心無一日不在茲。補弊舉偏，實惟後之君子是望。

元

南康鼓樓上梁文

王元渤

官府昇平、重見規模之整頓。譙樓鼎建、共聞更點之分明。事
係觀瞻、人胥鼓舞。睠惟南楚小邑、實據西江上流。衣冠文物
之名區、財賦舟車之都會。四街川麓、湧爲翠浪。流作玉虹。萬
戶農桑、翻盡黃雲。縑成白雪。地靈所屬、人傑尤多。詩書接周
濂溪、張橫渠道學之源流。人物經蘇翰林、陸學士名公之題
品。九經堂有鳳毛、九子簪纓、代代流芳。八桂樹應鸚鵡、薦人
旗鈴舉舉。奏捷崧降衮衣之上相、臚傳金榜之亞魁。較以他
邦盛哉茲邑。况馭宇據浮龜之勢、而鼓樓真氣象之雄。奈鄰
兇妄肆鴟張、致舊觀轉爲烏有。物無終晦、有廢則有興。時旣
再來、不容於不舉。翕若眾工之集、依然百尺之高。吏民觀聽之
如初。詔令頒宣之有地。厯厯山城、更漏永。敢侈萍鄉是好官。

員。沈沈村落鼓桴息。要使洛陽全無寇盜。虹梁上舉燕賀前陳。

上梁東。獨秀峰前杲日紅。江谷窮陰皆銖退。蒼生盡在照臨中。

上梁西。西山一塔與雲齊。頂頭誰挽天河水。盡洗兵塵無點飛。

上梁南。章江之水碧於藍。太守一從今去後。朝天願早入台三。

上梁北。九日山墟寄佳跡。百年之運一番新。此後豈無公衮出。

上梁上。頭邊聽得天鷄唱。諸賢攀桂不須梯。此去蟾宮無幾丈。

上梁下萬頃桑麻夾禾稼十朝一雨五日風歲歲豐登樂閒暇

伏願上梁之後朝清道泰時和歲豐公庭惟一日兩衙鄰境無四郊多壘日長漏永千室鳴絃夜靜更明五鄉奠枕水火盜賊之無作士農工商之相安歡聲所在一同好事於今登至一琴對一鶴不妨旁人笑馬骨之高雙劍夾雙魚且爲此邦應龍圖之讖時熙帝載敬亮天工

南康縣學重修大成殿記

艾幼玉

南楚邑學居城之東魁閣傑然下瞰章水水至是匯爲淵凝碧如池視他所特空闊舟楫上下仰瞻崔嵬輒聳然閣後卽禮殿氣象蹙迫且歲久東傾西圯凜凜將壓殊弗稱外所觀也大德丁未夏四月僉事郝公過之顧瞻徘徊睨穹碑則宋

紹興癸亥創建至是百六十有五年矣乃命縣官教官曰敝
陋如此見者能不動心其卜於講堂後圃卽堂基使更新廟
眾以學廩鮮薄辭則命率眾力爲之旣退縣官亟命具疏以
白郡守王公爲之倡俾直學郭壽老持以率諸儒大家出力
興事壽老歸告其父必發曰修造當先度材今寸植片瓦無
有將奈何其父曰今日之事汝爲政汝不率先其何以勸命
取鈔千五百貫貸公市木眾聞之躍然曰有如是吾事濟矣
由是士友各以力厚薄爲多寡靡然捐貲材木日積工役日
興縣官日督視人士日奔走若講堂禮殿以是年八月十三
日鼎新興建至九月初十日告成有殖其庭有覺其楹巍巍
堂堂巖巖翼翼前趾魁閣二十步後十步爲講堂端直軒豁
如再開闢兩廡延袤各增置屋四間由中及外塗塹煥然會

天子有詔以大成二字增崇先聖徽號官職章服詣新殿奉
安昭告神人闔懌井邑傾動余聞之殊爲是邑士友慶大成
禮殿至是而鼎創千載異恩百年盛觀一日合并若相期待
此非夫子聖靈之所感召斯文氣運之所融結何能兩美適
合一旦偕來諸生拜天朝作養之恩被邑宰絃歌之化仰瞻
宮牆如在闕里其亦厚自勉勵毋負明時若夫蘭省魁元甲
科上第厥有舊家榜樣在文運之昌於是乎徵矣抑是役也
闔端於僉事郝公表倡於郡守王公經始於縣達魯花赤也
先海牙鳩工集事則邑令秦忠翊之功也其糾率諸儒士不
擾而辦者主簿任將仕監造不輟者李縣尉能遵郝公之命
勉諸儒以相厥成者教諭上猶何光發其服勞供事者則有
教導羅國器蕭及翁直學郭公明陳友孫至於每日督責工

程者縣吏蔡英迺若朝斯夕斯鞠躬盡瘁始終乃事則郭必發父子實有力焉是皆宜記以勸來者於是乎書

南康縣儒學復田修造記

王南叔

鄆謹龜陰之田本魯故物而齊有之從容於一言之間侵疆來歸吾邑學廩不幸類是其亦幸而有能復之者惟邑學昔肇於三衢陳公升之蓋在郭之東隅建中靖國胡公晉侯徙於縣南卽今之學也靖康間邑宰李公能一撤其故而新之乾道間邑宰黃公由庚置田贍學諸生得以肄業景定間始創魁星閣於前學正劉介元實董是役辛未科以本經試省闈果應閣名之識登斯閣也高明爽塏俯章流之環繞挹秀峰之峭拔巽水會於前旭嶺枕於後實爲奇觀歲久物敝風雨震凌瓦縫疎缺椽朽拱榑朽腐獨甚禮殿講堂東西兩廡

後雖重建而簷脊瓦甍亦多毀裂櫺星門牆又爲漲濤所漂
泰定乙丑廣漢張株孫字可道南軒先生後人也典教是邑
視事初進諸生而言曰學校乃作養人才之地今墮廢如此
欲興修之而學廩不足奈何前廩有曰今學廩增矣昔蝕於
浮圖者三之一延祐乙卯教諭趙尙祖號石塘稽簿書躬屨
畝移文有司達於省憲閱實而復之卽馬齊崇文二莊計糧
六十三石該鄉桶一百九十石祭祀廩膳之餘尙可以給邑
士亦願捐財以助其用可道曰善遂構材募工先修禮殿次
講堂兩廡櫺星門牆葺完美惟魁星閣費不貲於是謀諸邑
寮時達魯花赤承直買驢縣尉張忽都荅兒典史張著皆以
斯文爲重協力捐俸邑士亦各助貲陶甍梓材趨事赴工咸
恐後自泰定丙寅冬鳩工至於丁卯秋落成今可道修學之